

VIA-SAKRA

Ho Via-Sakra ida-ne'e, ita harohan ba ema hotu vítima injustisa nian, pobreza nian, esplorasun nian, opresaun nian, nu'udar fatin teolójiku iha-ne'ebé Maromak revela ninia An. Ita la'o hamutuk iha Dalan Krús ida-ne'e, hodi tau iha ita-nia kabás krús sira mundu nian, to'o deskobre katak sarani ida-idak simu bolun ba santidad no ba libertasaun, libertasaun povu ssira-nian, feto, mane, labarik, katuas-ferik rai ida-ne'e nian.

Estasaun I: Pilatos kondena Jezús ba mate

ABUZU PODÉR NIAN

Ami adora....

Loroloron ita asiste abuzu podér nian: ita hanoin ba opresaun política, ba ditadura no situasaun hotu ne'ebé kria instabilidade no dezekilíbriu iha parte hotu mundu nian, hodi hakanek sira ne'ebé fraku liu, kiak liu no obriga sira atu nonok.

Husi Evanjellu S. Lucas nian (22, 67-69)

«Sira dehan: “O Messias karik, hateten mai ami ba.” Nia dehan ba sira: “Ha'u hateten karik, imi sei la fiar Ha'u; Ha'u husu imi karik, imi sei la hatán. Maibé houri ohin ba oin Oan Mane sei tur iha Maromak nia futar sorin”».

Ema hotu hanesan iha lei nia oin no iha direitu, laho diskriminasaun ida, no hanesan atu hetan protesun husi lei kontra diskriminasaun oioin ne'ebé viola Deklarasaun Direitu Umanu sira (art.7).

Silénsiu

Estasaun II: Jezús lori krús

POBREZA

Dala hira mak ita liu husi ema kiak ida nia oin ho indiferensa no ita nein hateke ba nia; dala hira, mak envezde halakon pobreza, ita mak aumenta ka hamosu. Mai ita aprende atu nafatin hamriik iha “ema kiak nia parte”, atu tau ita nia an iha sira nia moris, atu “hela iha sira-nia leet” no atu harahun Sistema hotu ne'ebé hamosu pobreza.

Husi Evanjellu Marcos nian (15, 20)

«Hasara tiha Nia, sira hasai hena mean, tau fali Nia hatais. Sira lori Nia husi ne'ebá atu hedi iha krús».

Indivíduu ida-idak iha direitu ba moris suficiente atu garante saúde, moris-di'ak ba an rasik no ninia família; no iha direitu ba seguransa iha dezokupasaun, moras, invalidéz, faluk, katuas-ferik ka kazu seluk bainhira nia lakon meu sira moris nian tanba situasaun la'ós husi ninia vontade rasik (Art. 25 DUDH).

Ita harohan: Na'i, hanorin ami atu la hadomi de'it ami-nia an ka ema sira ne'ebé hadomi ami. Hanorin ami atu hanoin ema seluk, atu hadomi liuliu sira ne'ebé ema ida la hadomi. Na'i sadia ema kiak hotu mundu nian.

Estasaun III: Jezús monu ba dala uluk

MIGRASAUN

Ema barak, iha tinan sira-ne'e, husik sira rain rasik ho esperansa atu to'o iha Rai riku sira hanesan Europa, maibé dalabarak Tasi mak sai fatin atu hako i sira-nia isin bá. Iha Kuarezma ida-ne'e ami aprende atu koñese dalan krús sira-ne'e, hodi sai ema sira ne'e hatene simu ema seluk.

Husi Evanjellu Lucas nian (9,26-27)

«Ema ruma moe karik kona ba ha'u no ha'u nia hanorin, Oan Mane mos sei moe kona ba nia wainhira Nia sei mai iha nia glória no iha glória Aman no anju santu sira nian. Tebes, Ha'u dehan ba imi: imi ne'ebé hamriik iha ne'e, balun sei la mate molok sira haree Maromak nia reinu».

Indivíduu ida-idak iha direitu ba Liberdade movimentu no rezidência nian iha Estadu ida nia laran. Indivíduu ida-idak iha direitu atu husik país ida, inklui ninian rasik, no atu fila hikas ba ninia país rasik. (Art. 13 DUDH).

Ita harohan: Maromak laran-saida nian, ami harohan ba ema hotu ne'ebé mate ho esperansa atu hetan moris ida di'ak liu. Halo ami la haluha sira, maibé bele onra sira-nia sakrifísiu ho obra sira liufali liafuan sira.

Estasaun IV: Jezús hasoru ninia Inan

VIOLÉNSIA - BULIZMU

Loroloron ita rona ema ko'alia kona-ba violénsia doméstika sira, bulizmu, 'ciber-bulizmu mós (ameasa liuhusi internet), uza internet atu halo esplorasau oioin. Saida mak ema sira ohin halo? Oinsá ita eduka foin-sa'e sira?

Husi Evanjellu Lucas nian (11,27-28)

«Nia sei ko'alia hela, feto ida husi ema lubun sira leet foti lia, dehan: "Rahun di'ak ba knotak ne'ebé ko'us Ita, no hirus matan ne'ebé fó susubeen ba Ita!" Maibé Nia hatán: "Rahun di'ak liu fali ba sira ne'ebé rona Maromak futar Lia hodi halo tuir nia!"».

Indivíduu ida-idak iha direitu ba Liberdade opiniaun no espresaun nian inklui direitu atu ema la asalta nia ba ninia opiniaun sira no iha direitu atu habelar informasaun no ideia sira liuhusi meu hotu no laho fronteira (Art. 19 DUDH).

Ita harohan: Na'i hanorin ami atu uza meu komunikasaun foun sira atu fahe esperiénsia pozitiva, atu habelar liafuan di'ak no hamosu sirkulu virtuoza ida domin no notisia di'ak nian.

Estasaun V: Simão Sireneu tulun Jezús

SAÚDE

Iha estasaun ne'e ita replete tema saúde nian, ita-nia Rain no mundu nian. Ita hanoin ema hotu ne'ebé la iha asesu ba kuidadu médiku sira. Ita labele husik mundu mate tanba falta kuidadu no asisténsia.

Husi Evanjellu Lucas nian (23,26)

«Wainhira sira lori Nia, sira kaer ema ida husi Sirene naran Simão, ne'ebé fila daudaun husi to'os, hodi tau krús iha nia kabás atu lori tuir Jezús».

Indivíduu ida-idak iha direitu ba moris, ba Liberdade no ba nia an rasik nia seguransa (Art. 3 DUDH).

Orasaun iha silénsiu.

Estasaun VI: Verónica hamaran Jezús nia oin

PROSTITUISAUN

Mundu ohin tenke konxiente kona-ba feto hotu ne'ebé hetan esplorasau, ne'ebé moris iha lurón ibun, laho liafuan konfortu nian, konsidera de'it nu'udar objetu sira prazér nian. Sarani ida-idak nia knaar atu fó hikas dignidade, beleza, ternura, moris.

Husi Evanjellu Lucas nian (10,36-37)

«Tuir ó-nia hanoin, sira na'in tolu ne'e, ida ne'ebé mak maluk ba ema ne'ebé monu iha na'okten sira nia liman?» Nia hatán: «Ida ne'ebé hatudu laran-luak ba nia.» No Jezús hateten ba nia: «Bá, hodi halo mós nune'e».

Ema ida labele interfere naranaran de'it iha ema ida nia moris privada, iha ninia família, iha ninia korrespondénsia sira, labele mós hafoer ninia onra no nia reputasaun. Indivíduu ida-idak iha direitu atu hetan protesaun husi lei kontra interferénsia ka hahalok aat sira-ne'e (Art. 12 DUDH).

Orasaun iha silénsiu

Estasaun VII: Jezús monu ba dala rua

ESTRAGA / SOE HAHÁN

Dala barak ita estraga hahán hodi la hanoin ba ema ne'ebé mate tan hamlaha. Hotu-hotu tenke iha possibilidade atu iha refeisaun ida, no labele hamlaha.

Husi Evanjellu Lucas nian (11,42)

«Rahun aat ba imi, farizeu sira, ne'ebé selu impostu ruku nian, salsa no modo tomak nian, maibé haluha justisa no domin ba Maromak! Imi sei halo duni buat ne'e, maibé keta haluha buat seluk».

Indivíduu ida-idak iha direitu ba padraun moris ida ne'ebé suficiente atu garante saúde no moris-di'ak ba ninia an no ba ninia família, ho atensaun partikulár ba hahán, ba hatais, ba uma, no ba kuidadu médiku sira no ba servisu sosiál hotu ne'ebé nesesáriu (Art.25 DUDH).

Ita harohan: Na'i, haraik ba ema hotu, liuhusi ami mós, sira-nia nesesidade nune'e, hodi sai livre husi nesesidade sira, sira bele serví Ita iha Liberdade no iha páz.

Estasaun VIII: Jezús hasoru feto di'ak sira

ESPLORASAUN MENORORIDADE NIAN NO TURIZMU SEKSUÁL

Iha ema barak husi nasaun oioin mak halo viajen ba turizmu seksuál. La iha ema ida viola, explora no abuza labarik feto ida, labarik mane ida, mane no feto ida.

Evanjellu Lucas nian (23,27-31)

«Ema lubun boot tuir Nia, no mós feto sira ne'ebé tanis hodi hanoin tebes Nia. Maibé Jezús fila oin ba sira, dehan: «Jerusalém nia oan-feto sira, imi keta tanis tanba Ha'u; di'ak liu tanis tan imi an rasik no tan imi-nia oan sira. Basá loron sei to'o mai wainhira ema sei dehan: 'Rahun di'ak ba feto sira ne'ebé oan la iha, knotak sira ne'ebé la ko'us, hirus matan sira ne'ebé la fó susuben.' Iha loron ne'ebá sira sei dehan ba foho aas sira: 'Imi monu mai ami leten!' no ba foho kiik sira: 'Imi taka tiha ami!' Basá sira halo ona nune'e karik ba ai-hun matak, ba ai-hun maran sira sei halo sa ida?'».

Maternidade no infánsia iha direitu ba kuidadu espesiál no asisténsia. Labarik hotu, moris husi matrimóniu ka lae, tenke hetan protesaun sosiál ne'ebé hanesan (Art. 25 DUDH).

Ita harohan: Santa Josefina Bakhita, husi kedas labarik ema faan nian nu'udar atan no tenke enfrenta difikuldade no terus wain oioin. Bainhira nia sai livre ona husi moris-atan fíiziku nian, nia hetan redensaun loloos iha enkontru ho Kristu no nia Kreda. Na'i, liuhusi ninia harohan-daet, tulun sira ne'ebé monu iha moris-atan ninia hani sira.

Estasaun IX: Jezús monu bada la tolu

LIBERDADE HANOIN NIAN

Bainhira halakon liberdade atu esprime hanoin rasik ema sai kiak. Kapasidade atu dezenvolve individualidade rasik sei kuran no moris sei nakfilak iha "sobreviénsia".

Husi Evanjellu Lucas nian (17,1-3)

«Jezús dehan tan ba nia eskolante sira: "Ezemplu aat sira sei iha duni; maibé ema ne'ebé fó ezemplu aat sei hetan kastigu. Kesi fatuk boot dulas batar nian ida ba nia kakorok hodi soe nia ba tasi, di'ak liu fali nia dada labarik kiik sira ne'e ida ba sala." "Imi rona di-di'ak: ó-nia maluk ida halo sala karik, fó hatene ba nia; nia hakribi sala karik, perdua nia».

Indivíduu ida-idak iha direitu ba Liberdade hanoin nian, konxiénsia nian no relijiaun nian; [...] atu troka relijiaun ka fiar, no atu manifesta, mesak ka iha komún, nune'e mós iha públiku ka privadu, relijiaun rasik ka ninia fiar rasik iha hanorin, iha prátika sira, iha kultu no iha observaun ritu sira nian (Art. 18 DUDH).

Orasaun iha silénsiu

Estasaun X: Ema kolu Jezús nia hatais

ALUGA-BANKU-PEÑOR

Iha banku oioin ne'ebé jere osan sira; iha ema sira ne'ebé fó aluga ba ema seluk no peñor ho funan maka'as. Iha banku sira ne'ebé jere ita-nia osan hodi fó ita-nia osan ba sosa kilat sira ka selu funu sira. Nu'udar sarani ita presiza hili banku sira ne'ebé iha étika, ne'ebé la han matak ema kiak sira no la iha defeza no la finansia funu sira hodi valoriza liu ema nia moirs.

Husi Evanjellu Lucas nian (12, 22-23.28.31)

«Tuir mai Nia dehan ba nia eskolante sira: "Tan ne'e mak Ha'u dehan ba imi: keta hanoin resin kona ba imi-nia moris, no buat ne'ebé imi sei han, eh kona ba imi-nia isin no oinsá imi sei hatais. Basá moris folin liu fali aihan, no isin folin liu fali hatais. Ne'e duni, Maromak ne'ebé fó hatais ba du'ut ne'ebé ohin buras iha to'os laran no aban ema soe ba ahi, Nia sei hanoin liu tan imi, ema fiar kiik!».

Indivíduu ida-idak, nu'udar membru sosiedade nian, iha direitu ba seguransa sosiál, ba realizasaun liuhusi esforsu nasional no kooperasaun internasionál no relasionamentu ho organizasaun no rekursu sira Estadu nian, direitu ekonómiku sira, sosiál no kulturál indispensavel ba ninia dignidade no ba dezenvolvimentu livre ninia personalidade nian. (Art. 22 DUDH).

Orasaun silensioza

Estasaun XI: Ema hedi Jezús iha krús

MAFIA

Mafia mak organizasaun ida ne'ebé hala'o atividade illegal sira. Mafia haterus mundu ohin nian, kria desconfortu, kontinua hanehan, sai kauza ba injustisa barak, oho. Iha estasaun ida-ne'e iha harohan ba vítima sira mafia nian, ba sira ne'ebé haka'as an atu luta hasoru buat aat ida-ne'e.

Husi Evanjellu Lucas nian (23, 33. 47)

«Wainhira sira to'o fatin naran Kalváriu, sira hedi Nia ba krús ho ema aat sira ne'e, ida iha sorin kuana, ida seluk iha sorin karuk. Haree tiha buat ne'ebé mosu, senturiaun hahí Maromak, dehan: "Tebes, ema ne'e, ema di'ak duni!" ».

Indivíduu ida-idak iha direitu ba Liberdade reuniaun no asosiasaun pasífika nian. Ema ida labele obriga ema ida atu halo parte asosiasaun ida (Art. 20 DUDH).

Ita harohan: Na'i ami harohan ba ema sira ne'ebé sofre tanba hahalok mafia nian ne'ebé kria moris-atan, bloka ekonomia, redús espasu ba serbisu onestu. Halo ami-nia rain sai rain ne'ebé livre husi mafia, respeita ema no ninia direitu sira.

Estasaun XII: Jezús mate iha krús

MATE

Iha estasaun ne'e ita hanoin matebian sira hotu no sira ne'ebé sei iha situasaun terus nian, atu sira bele haree beleza no bele kaer metin ba Fatuk Inan, katak Kristu nune'e bele moris hi'as.

Husi Evanjellu Lucas nian (23, 44-46)

«Besik ona loron fahe rua, nakukun taka rai tomak to'o suku tolu loraik, tan loro matan lakon tiha. Hena templu nian naklés fahe rua iha klaran, no Jezús hakilar ho lia maka'as: "Aman, iha Ita liman Ha'u saran Ha'u nia klamar!" Dehan tiha ne'e, Nia iis kotu».

Ema ida labele halo indivíduu seluk hela iha estadu moris-atan nian... Tenke bandu moris-atan ninia forma hotu (Art. 4 DUDH).

Orasaun silensioza

Estasaun XIII: Ema hatún Jezús husi krús

HALAKON DIGNIDADE UMANA

Iha parte barak mundu nian ema barak nia dignidade ema seluk halakon tiha: kiak sira, imigrante sira, sai vítima explorasaun, hetan violénsia, prostituisaun. Iha estasaun ida-ne'e ita hanoin sira hotu atu labele haluha ema ida. Mane ida-idak, feto ida-idak rai ne'e nian iha direitu atu iha naran ida.

Husi Evanjellu Lucas nian (23, 50-52)

«Iha na'i ulun ida, naran José, ema laran di'ak ida husi rai Arimateia, sidade ida iha Judeia. Nia membru ida konsellu nian, nia la tuir nia maluk sira nia hakarak no hahalok sira, maibé hein daudaun Maromak nia reinu. Nia ba ko'alia ho Pilatos, hodi husu Jezús nia isin mate».

Ema hotu moris livre no hanesan iha dignidade no direitu sira. Sira iha razaun no konxiénsia no tenke trata malu iha espíritu fraternidade nian (Art. 1 DUDH).

Ita harohan: Maromak, ami-nia Kriadór, ita tau matan ba ema hotu nu'udar Aman ida no Ita hakarak atu ema hotu sai família ida de'it no haree malu nu'udar maun-alin no fahe soin sira rai nian ho justisa. Haraik kbiit Espíritu nian atu ami la taka an maibé sente responsabilidade sosiál atu hala'o ida-ne'e ho modu ativu.

Estasaun XIV: Ema hatún Jezús husi krús no manán mate

LIBERTASAUN NO SANTIDADE

Iha estasaun ikus ida-ne'e ita harohan atu hetan libertasaun husi buat hotu ne'ebé halo aat mai ita, husi buat ne'ebé halo ita kiak. Ita presiza halo hikas fali ita-nia dalan santidade nian, santidade ba ema hotu, la esklui ema ida.

Husi Evanjellu Lucas nian (23, 53-56)

«Hatún tiha husi krús, nia falun tiha Nia ho hena mutin, hodi tau Nia iha rate foun ida, iha ne'ebé seidauk hakoí ema ida. Ne'e preparasaun nian, no loron Sábadu atu hahú ona. Feto sira ne'ebé tuir Nia husi Galileia ba hamutuk ho José. Wainhira sira fila fali ona, sira prepara mina-morin. Iha Sábadu tuir lisan sira la kaer serbisu».

ORASAUN FINÁL

Oh Kristu nia Krús, ohin loron mós ami haree ita-nia Krús hari'i iha ami-nia biin no maun-alin sira ne'ebé ema oho, ne'ebé ema tesi kotu sira-nia kakorok ho surik no ho silénsiu kovarde. ohin loron mós ami haree ita-nia Krús, iha labarik sira, iha feto sira no ema sira nia oin, ne'ebé kole no ta'uk tanba funu no violénsia sira no dalabarak sira hetan de'it Pilatos wain ne'ebé fase sira-nia liman

Oh Kristu nia Krús, ohin loron mós ami haree ita-nia Krús iha doutór surat-tahan sira nian maibé la'ós espíritu nian, mate nian no la'ós moris nian, ne'ebé envezde hanorin mizerikórdia no moris, ameasa ho kastigu no mate no kondena ema justu.

Oh Kristu nia Krús, ohin loron mós ami haree ita-nia Krús iha ministru infél sira ne'ebé envezde hasai husi sira-nia an ambisaun folin-laek sira, sira hasai fali mak inosente sira husi sira-nia dignidade rasik. Oh Kristu nia Krús, ohin loron mós ami haree ita-nia Krús iha ema sira ne'ebé hakarak hasai ita husi fatin públiku sira no esklui ita husi vida pública, hodi paganizmu laikál nia naran ka hodi igualdade nia naran, ne'ebé Ita rasik hanorin mai ami.

Oh Kristu nia Krús, ohin loron mós ami haree ita-nia Krús iha kbiit-na'in sira no vendedór sira kilat nian ne'ebé haboot ahi funu nian ho raan inosente maun no biin-alin sira-nian.

Oh Kristu nia Krús, ohin loron mós ami haree ita-nia Krús iha traidór sira ne'ebé ho osan tolunulu entrega ema ba mate.

Oh Kristu nia Krús, ohin loron mós ami haree ita-nia Krús iha na'ok-teen no korrupción sira ne'ebé envezde tau matan ba di'ak komún no étika sira faan fali sira-nia an iha merkadu imoralidade nian.

Oh Kristu nia Krús, ohin loron mós ami haree ita-nia Krús iha sira ne'ebé harahun “uma komún” ne'ebé ho egoísmu estraga jersaun tuirmai ninia futuro.

Oh Kristu nia Krús, ohin loron mós ami haree ita-nia Krús iha katuas-ferik sira ne'ebé família sira abandona, ema deficiente sira no labariks ira lahó nutrisaun no sira ne'ebé sosiedade egoista no laran-makerek soe.

Oh Kristu nia Krús, ohin loron mós ami haree ita-nia Krús iha bebé sira husi relasaun seksu livre ne'ebé inan sira oho, imajen husi konxiénsia ida ne'ebé la iha sensibilidade morál no drogada.

Oh Kristu nia Krús, ilas domin ne'ebé la nahas no dalan Moris-Hi'as nian, ohin loron mós ami haree ita iha ema di'ak no justu sira ne'ebé halo buat di'ak hodi la buka ema seluk nia hahí ka admirasaun.

Oh Kristu nia Krús, ohin loron mós ami haree ita-nia Krús iha ministru fiél sira ne'ebé leno ami-nia moris nia nakukun hanesan lilin sira nne'ebé nabeen ho modu gratuitu atu leno ema ki'ik liu nia moris.

Oh Kristu nia Krús, ohin loron mós ami haree ita-nia Krús iha Irmán no konsagradu sira nia oin – samaritanu di'ak sira – ne'ebé husik buat hotu atu kurativu, iha silénsiu evanjéliku, kanek sira pobreza no injustisa nian.

Oh Kristu nia Krús, ohin loron mós ami haree ita-nia Krús iha mizerikordiozu sira espresaun aas liu justisa no fiar nian.

Oh Kristu nia Krús, ohin loron mós ami haree ita-nia Krús iha ema simples sira ne'ebé moris ho ksolok sira-nia fiar iha moris loroloron no iha observánsia filial ukun-fuan sira-nian.

Oh Kristu nia Krús, ohin loron mós ami haree ita-nia Krús iha ema sir ane'ebé arrepende ne'ebé hatene, iha profundidade mizéria sira-nia moris sala-na'in nian, hakilar: Na'l hanoin ha'u bá iha Ita-nia reinu!

Oh Kristu nia Krús, ohin loron mós ami haree ita-nia Krús iha beatu no santu sira ne'ebé hatene liu husi nakukun fiar nian hodi la lakon konfiansa iha Ita no hodi la pretense komprende Ita-nia silénsiu misteriozu.

Oh Kristu nia Krús, ohin loron mós ami haree ita-nia Krús iha família sira ne'ebé moris iha fidelidade no fekundidade sira-nia vokasaun kaben nian.

Oh Kristu nia Krús, ohin loron mós ami haree ita-nia Krús iha voluntáriu sira ne'ebé tulun ho laran-luak ema sira ne'ebé presiza no hetan susar.

Oh Kristu nia Krús, ohin loron mós ami haree ita-nia Krús iha sira ne'ebé ema persege tanba sira-nia fiar ne'ebé iha terus laran kontinua fó sasin auténtiku kona-ba Jezús no Evanjellu.

Oh Kristu nia Krús, ohin loron mós ami haree ita-nia Krús iha mehidór sira ne'ebé moris ho fuan labarik nian no serbisu loron ba loron atu halo mundus ai fatin ida di'ak liu, umanu liu, justu liu.

Iha Ita Krús Santa ami haree Maromak ne'ebé hadomi to'o rohan, no ami haree ódiu ne'ebé ukun no halo ema sira ne'ebé hakarak liu nakukun duke naroman, sai delek ema nia fuan no neon.

Oh Kristu nia Krús, Noé nia Arka ne'ebé salva humanidade husi dilúviu salan nian. Salva ami husi aat no Aat nia na'in!

Oh David nia Kadunan no kadeadu Aliansa Maromak nian no rohan-laek, fanun ami husi loko-an nia babeur sira! Oh hakilar domin nian, hamoris iha ami hakaran Maromak nian, di'ak nian, roman nian. Oh Kristu nia Krús, hanorin ami katak loron nia nakaras forte liufalikalan nia nakukun. Oh Kristu nia Krús, hanorin ami katak vitória parente Buat Aat nian lakon iha rate mamuk nia oin no iha serteza Moris-Hi'as no Maromak nia domin nia oin ne'ebé la iha buat id abele manán ka tau sees ka halo sai fraku. Amen!

Papa Francisco